



**Sud Bosne i Hercegovine
Sud Bosne i Hercegovine**

**Broj: S1 3 Iž 038182 20 Iž
Sarajevo, 28.10.2020. godine**

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović, kao predsjednika vijeća, Srete Crnjaka i Vesne Trifunović, kao članova vijeća, odlučujući o žalbi žalitelja Milene Popović, Bulevar oslobođenja 32, 21 000 Novi Sad, R Srbija, izjavljenoj protiv Odluke Centralne izborne komisije Bosne i Hercegovine broj 05-1-07-1-998/18 od 1.10.2020. godine o odbijanju upisa u izvod iz Centralnog biračkog spiska za glasanje van BiH za Lokalne izbore 2020.godine, u nejavnoj sjednici, održanoj dana 27.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje van BiH za Lokalne izbore 2020. godine za ukupno 27.960 birača po prijavama podnesenim do 1.9.2020. godine, zbog neispunjavanja uslova iz odredbi člana 3.15 stav 1., 2. i 3. Izbornog zakona BiH. U odnosu na žaliteljicu odbijen je upis iz razloga što je ista registrovana na više različitih adresa.

Protiv ove odluke žaliteljica je blagovremeno izjavila žalbu u kojoj navodi da je utvrdila da se ne nalazi na spisku glasača za glasanje putem pošte jer je prijavljena na više adresa, te ističe da je njena tačna adresa Bulevar Oslobođenja 32, Novi Sad.

Centralna izborna komisija Bosne i Hercegovine u odgovoru na žalbu navodi da su za podnositeljicu žalbe dostavljene dvije prijave u kojima su navedene različite adrese na koje će biti upućen glasački materijal, te da žaliteljica nije dostavila potvrdu nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja ožalbene odluke, a prilikom razmatranja prijave dostavljenih za žaliteljicu, utvrdio da su za žaliteljicu dostavljene dvije prijave na PRP-2 Obrascu – Potvrda prijave za glasanje izvan BiH, te da su u prijavama navedene različite adrese na koje će biti upućen glasački materijal. U prvoj prijavi je navedena adresa Bulevar Oslobođenja 32, 21 000 Novi Sad, R Srbija, dok je u drugoj prijavi navedena adresa Živka Petrovića 14, 11 080 Zemun, R Srbija.

I po shvatanju apelacionog vijeća, druga dostavljena prijava žaliteljice Milene Popović se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositeljica žalbe podnošenjem druge prijave nije ukazala da ima saznanja o podnesenoj prvoj prijavi, kada bi se moglo cijeniti da druga podnesena prijava predstavlja promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1. Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1. citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositeljica žalbe nije Centralnoj izbornoj komisiji BiH dostavila, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovana prava adresa njenog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužna dokazati podnositeljica prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović